



Služba za saobraćaj, stambeno-komunalne poslove i građenje

OPĆINSKO VIJEĆE ILIJAŠ

**Odgovori na vijećnička pitanja i inicijative sa 32. sjednice Općinskog vijeća Ilijaš
održane dana 28.06.2019.godine**

Ilijaš: Juli 2019.godine

SEAD ŠEHIĆ – vijećnik SDA

Inicijativa: "Inicijativa od strane Grupe građana iz ul. Hašima Spahića od broja 12 do 20. Naime, ova grupa građana zamolila je da iznesem njihov problem koji je prisutan već duže vrijeme, a radi se o sanaciji odvodnih kanala (šahtova) u koje se slijevaju oborinske vode.

Obrazloženje: U navedenoj ulici od ukupno deset prihvatnih šahtova samo su dva u funkciji, tako da prilikom malo većih padavina isti nisu u mogućnosti da prihvate oborinske vode, te stoga dolazi do preljevanja oborinskih voda preko ivičnjaka i dolazi do poplave pred ulazima u zgradu kao i u podrumске prostorije. Sve oborinske vode teku ispod zgrade i plave određeni dio poslovnih prostora, a nakon povlačenja vode ostaje velika količina mulja i blata. Tako da je stanarima otežan prilaz zgradi. S tim u vezi, stanari ove ulice da bi riješili ove probleme obraćali su se JKP "Vodostan" Ilijaš, zatim nadležnoj opštinskoj službi. Doduše, na njihov zahtjev 2016. godine radnici Vodostana su samo izvršili pročepljenje navedenih šahtova, međutim, problem nije trajno riješen. Sa istim zahtjevom su se obraćali i 12.07.2017. godine, ali nisu dobili nikakav odgovor, niti je izvršena sanacija navedenih šahtova. Kantonalni inspektor je dana 03.02.2016. godine na licu mjesta izvršio nadzor na pomenutoj lokaciji i konstatovao da su navodi u prijavi tačni, a odnose se na odvodnju oborinskih voda. Utvrdio je da će njihova molba za sanaciju odvodnih šahtova istog dana biti dostavljena JKP "Vodostan" Ilijaš na izvršenje.

Iz gore navedenih razloga, stanari ove zgrade mole i traže da se njihov problem što prije riješi, odnosno da se izvrši potpuna sanacija odvodnih kanala (šahtova). Osim toga, obzirom da u posljednje vrijeme imaju problema oko parking prostora pa su prinuđeni da vozila ostavljaju na trotoarima ili na mjestima gdje je parkiranje zabranjeno, ističu zahtjev da se izmjenama i dopunama Regulacionog plana ovog dijela Ilijaša predvidi i parking prostor.

Također, ova ulica je puna udarnih rupa na asfaltu, a i sam asfalt je dotrajavao i mnogo smeta normalnom odvijanju saobraćaja. Također, ova grupa građana učestvovala je i u javnoj raspravi o ovom našem sadašnjem Budžetu i predlagali su i amandmana koje su uredno dostavili na protokol, ali eto nikad im nisu ni služba ni bilo ko izašao u susret.

Zato vas u njihovo i u svoje ime molim da ovu inicijativu uvažite, a ako ne sada onda za sljedeću Budžetsku godinu i uvrstite u prioritetno izvršenje.

Odgovor: Služba prihvata inicijativu. Služba je izašla na teren sa predstavnikom JKP "Vodostan" d.o.o. Ilijaš, gdje je bila prisutna i pomenuta grupa građana. Dogovorili smo se oko rješenja odvodnje oborinske vode, bit će riješeno u narednom periodu. Kada je u pitanju sanacija ulice može se planirati u Budžetu za 2020. godinu. Udarne rupe će se rješavati u skladu sa mogućnostima (operativno i finansijski).

ALMIR ŠPIODIĆ – vijećnik BPS-Sefer Halilović

Inicijativa: Pokrećem inicijativu ispred grupe građana MZ Podlugovi ulice Polomska, Žrtava genocida u Srebrenici, Moševačke, naselja Vratuša, Makljen, naselje Obala, Sovrle I i Sovrle II za izgradnju podzemnog prolaza za pješake ispod željezničke pruge od željezničke stanice u Podlugovima do ul. Žrtava genocida u Srebrenici. **Obrazloženje:** Podsjećam Vas da je grupa građana MZ Podlugovi – ulica Polomska, Žrtava genocida u Srebrenici, Moševačke, naselja Vratuša, Makljen, naselje Obala, Sovrle I i Sovrle II od dana 11.04.2019. godine do 15.04.2019. godine, nakon nesretnog slučaja smrti učenika SŠC "Nedžad Ibrišimović" u Ilijašu, Ramić Belmina, koji je smrtno stradao na jednom od parkiranih vagona na Željezničkoj stanici u Podlugovima odlučila da pokrene inicijativu za izgradnju podzemnog prolaza za pješake ispod željezničke pruge u Podlugovima, sa ulice Žrtava genocida u Srebrenici prema autobuskoj stanici Podlugovi.

Tokom prikupljanja potpisa za pokretanje inicijative za izgradnju podzemnog prolaza ispod željezničke pruge, građani su izrazili visok stepen nezadovoljstva i straha kako za sebe tako i za svoju djecu oko prelaska željezničke pruge u Podlugovima.

Radi lakšeg razumijevanja ovog problema, želimo napomenuti da oko 3000 građana MZ Podlugovi, odnosno ovih ulica i naselja, najmanje dva puta u jednom danu prelazi prugu u oba smjera tj. iz ulice Žrtava genocida u Srebrenici prema autobuskoj stanici i obrnuto. Prilikom prelaska skoro svakog dana na jednom ili dva željeznička kolosjeka stalno je parkirano više od 25 teretnih vagona, oko 15 vagona zatvorenih cisterni sa gorivom, te svakodnevno u oba smjera prolaze vozovi u redovnom režimu saobraćaja.

Zbog duge kolone parkiranih vagona i cisterni, građani ovih ulica i naselja prinuđeni su prelaziti preko platformi vagona ili se provlačiti ispod vagona koji su parkirani na željezničkoj stanici. Zbog nepostojanja obezbjeđenog prolaza u dužini od cca 50 m ispod ili iznad pruge, građani su primorani da se izlažu riziku kretanja preko željezničkih kolosjeka ili da pješake 3-5 kilometara kako bi došli do ambulante, autobuske stanice, tržnih centara itd. sa jedne strane željezničke pruge i do OŠ "Podlugovi" sa druge strane pruge. Kada građani i djeca prelaze vagone ili se provlače ispod, istim nije siguran prolaz zbog pomicanja tih kompozicija u momentu prelaska, kao i to da te parkirane cisterne, koje su uvijek bez nadzora radnika Željezničke stanice, mogu biti trenutna opasnost kako zbog goriva koje je u njima, tako i zbog električne energije, tj. visokog strujnog napona, koji je u gore pomenutom slučaju izazvao gubljenje/smrť jednog mladog života.

Pored gore navedenog, želimo naglasiti da učenici OŠ "Podlugovi" iz MZ Ljubnići i Lješevo takođe koriste obostrani prelazak preko željezničke pruge, tako da se i oni susreću sa ovim problemima prilikom dolaska i odlaska iz škole. Svim građanima i učenicima koji koriste javni prevoz iz Podlugova u pravcu Ilijaša i Sarajeva, takođe je otežan dolazak na autobusku stanicu Podlugovi, kao i odlazak u Ambulantu Podlugovi, te u prodavnice, ogrjev, apoteke i druge objekte koji se nalaze u ulici Moševačka. Dana 15.04.2019. godine u 18:30 h, u prostorijama JU OŠ "Podlugovi" održan je sastanak Vijeća roditelja koji su takođe svojim potpisima podržali ovu inicijativu za izgradnju podzemnog prolaza za pješake ispod željezničke pruge u Podlugovima.

U ranijem periodu Vijeća roditelja OŠ "Podlugovi" je upozoravalo na ovaj problem nadležne u općini Ilijaš, PU Ilijaš i menadžment Željeznica F BiH, ali se do sada, iz nama nepoznatih razloga, nije našlo adekvatno rješenje za ovaj problem, tj. problem prelaska građana i djece preko željezničke pruge.

Na kraju ove inicijative želimo najiskrenije zamoliti, kolegij Općinskog vijeća Ilijaš da u konsultaciji sa općinskim načelnikom i općinskim službama ovu inicijativu preimenuju u Zaključak i dostave ga na narednoj sjednici u materijalima na usvajanje, shodno Poslovniku Općinskog vijeća koji glasi:

Da se odmah pokrene zakonska procedura rješavanja podzemnog prolaza za pješake ispod željezničke pruge u Podlugovima, a to podrazumjeva izmjene i dopune Regulacionog plana Podlugovi i ako istim nije predviđen prolaz ispod pruge na pomenutoj lokaciji, pribavljanje određenih saglasnosti, izrada projekta itd.

Također, tražim od nadležne općinske službe da ovu inicijativu, sa prikupljenim potpisima, uputi na sve relevantne adrese, odnosno institucije koje bi mogle pomoći rješavanju ovog problema:

1. Vlada Federacije BiH,
2. Federalnom ministarstvu prometa i komunikacija,
3. Ministarstvu prostornog uređenja Kantona Sarajevo,
4. Ministarstvu saobraćaja Kantona Sarajevo,
5. Direkciji za ceste Kantona Sarajevo,
6. Vladi i Skupštini Kantona Sarajevo
7. Općinska Služba prostornog uređenja i zaštite okoliša
8. Drugim institucijama koje bi mogle finansijski pomoći u izgradnji ovog podzemnog prolaza, jer građani MZ Podlugovi znaju da općina Ilijaš možda trenutno nije u mogućnosti sama finansirati izgradnju podzemnog prolaza ispod željezničke pruge.

U prilogu dostavljam potpise građana MZ Podlugovi.

Odgovor: Inicijativa se prihvata i pokreće se procedura shodno planskoj dokumentaciji. U ovoj godini će se uraditi idejni projekat, prema RP "Podlugovi" je data lokacija za podhodnik koji gravitira školi. Obzirom da su pojedinačno potrebna velika finansijska sredstva, kad se završi idejni projekat ići će se u postupak konstrukcije finansiranja tog projekta i tada će se ova inicijativa uputiti na relevantne adrese koje su date u ovoj inicijativi.

Pitanje: Kada će biti podjela kanti za selektivno odlaganje otpada u MZ Podlugovi? Podjela kanti za selektivno odlaganje otpada počelo je još 2017. godine u 8. mjesecu i krenulo se redom od Lješeva, Ljubnića, pa su se preskočili Podlugovi, podijeljene su u Misoči, a onda u maju 2019. godine podijeljene su u naselju Kamenica i ul. Bosanski put. Ima li neki

redoslijed po prioritetima i kriterijima ili se vrši podjela na osnovu nekog drugog lobija i ko uopće određuje gdje će se vršiti podjela? Ovaj projekat sa kantama je odličan i za svaku pohvalu, samo vas molim da ne budu Podlugovi zadnji koji će dobiti ove kante, jer mi već sad imamo problema da ljudi kabasti otpad dovlače u Podlugove i ostavljaju pored kontejnera.

Odgovor: Nabavka PEHD kanti za komunalni i reciklažni otpad za MZ Podlugovi i MZ Mrakovo je planirana Operativnim planom Općinskog Načelnika i Službi općine Ilijaš za 2019 godinu. Do sada su provedene slijedeće planirane aktivnosti: priprema tenderske dokumentacije, procedura javne nabavke, sklapanje ugovora sa dobavljačem, isporuka kanti na lokaciju RJ KJKP"Rad"d.o.o.Sarajevo u Ilijašu, izrađen sporazum o korištenju PEHD kanti koji je potpisan od strane Općinskog Načelnika i v.d. Direktorice KJKP"Rad"d.o.o.Sarajevo. Očekujemo implementaciju ovog projekta na području MZ Podlugovi i MZ Mrakovo u što kraćem roku.

ELDAR ŠEHIĆ – vijećnik SDP-a

Čestitam Almiru Špiodiću, jer on stvarno iznosi sve ono što treba i što nije uredno. Na sjednici Vijeća od 18.04.2019.godina imao sam dva pitanja i inicijativu. Od ta dva pitanja na jedno mi je odgovoreno, samo mi je ponovljeno pitanje i bukvalno je ponovljeno kao odgovor. Ja sam pitao zašto linije koje su ocrtane prema Popovićima u februaru nisu se zadržale duže od dvadeset dana. Meni je odgovoreno da su linije ocrtane u februaru i da su za to zadužene Auto-cesta, a ja od opštine tražim, ukoliko su u mogućnosti, utiču na izvođače radova da rade onako kako bi se trebalo raditi. Sada do Popovića nema niti jedne linije, pješačkog prelaza, trotoara, a znate koliko ima pješaka koji prolaze tim putem. Uglavnom na moje pitanje sam dobio moje pitanje prepisano u potvrdnoj rečenici, ne u upitnoj.

Odgovor:Održavanje horizontalne signalizacije se vrši periodično i u nadležnosti je Upravitelja koji održava saobraćajnicu. Vaše pitanje smo prosljedili Direkciji za puteve i do slanja materijala za OV-e nismo dobili odgovor, po dobijanju istog bit će dostavljeno.

Pitanje:Drugo pitanje je bilo vezano za sanaciju puteva koje oštete izvođači radova na apartmanskim naseljima. Ja sam čekao dvije sjednice, obzirom da sam mislio da treba malo više vremena da se odgovori na to pitanje, ali odgovor nisam dobio, tako da želim to pitanje ponovo postaviti onako kako sam postavio 18.04.2019. godine.

Znači, da se odgovori ko je zadužen za sanaciju štete na javnim dobrima – putevima koju prouzrokuju izvođači radova na apartmanskim naseljima i ako je moguće, putevi koji su manje nosivosti da se stave znakovi i sva ostala ograničenja koja će smanjiti propadanje tih puteva.

Svjesni smo da općina finansira dio puteva koji se prave, ali isto tako smo svjesni da građani plaćaju svoje puteve i sudjeluju zajedno sa općinom u istima tako da mislim da građani moraju da znaju ko im uništava puteve i ko će biti nadležan da popravi iste.

Odgovor:Za sanaciju štete zadužen je onaj koji i napravi štetu. Općina Ilijaš nema ugovor za redovno održavanje lokalnih cesta pokrenuto ovim pitanjem. Služba će predložiti OV-u da u Budžetu za 2020 godinu planira sredstva za ovu namjenu kako bi imali izvođača radova koji bi vršio redovnu ophodnju lokalnih puteva i vršio popravke istih.

MUHAMED HANDŽIĆ – vijećnik BPS-Sefer Halilović

Ja moram napomenuti da na jedno od mojih prethodnih pitanja koje sam postavljao na prethodne tri sjednice nisam dobio adekvatan odgovor. Nisam dobio takoreći nikakav odgovor, a očekivao sam da dobijem odgovor od komunalnog inspektora kako je već Almir naveo. Dakle, tražio sam da mi dostavi Izvještaj sa nadzora o stajnjacima koji su uzrok širenja neugodnog mirisa u Ilijašu i naseljima oko Ilijaša. Lik se dosjetio da mi da odgovor da to nije njegova nadležnost i napisao je da u ovom slučaju ja nemam pravo ni da tražim Izvještaj niti da uputim Zahtjev za inspekcijski pregled ovim uzročnicima. On je napisao da to ima pravo Vlada KS, kantonalno resorno ministarstvo, Direkcija kantonalne uprave za nadzor i inspekciju i pravna i fizička lica. U ovom slučaju ja sam vijećnik, pa ne znam kako on mene tretira. Sigurno nisam pravno, ali jesam fizičko lice. Međutim, on me nije tretirao ni tako. Tako da mi nije dostavio odgovor i napisao je da on meni ne može dati razuman

odgovor. Zamislite to. Ne može mi dati razuman odgovor, jer on pod uticajem već čega, nas dvojica se ne razumijemo. E ja očekujem da mi da razuman odgovor još slijedeću sjednicu Vijeća i ja ću nastojati da napišem prijavu Inspekciji za javnu upravu i da oni prekontrolišu šta je njegova nadležnost i nadležnost Službi u općini Ilijaš. Ako misli da one meni ne treba dostaviti taj Izvještaj, onda ja griješim i ja se njemu izvinjavam, a mislim da smo mi zakonodavni organ u općini Ilijaš i da traženo od izvršnog organa trebamo dobiti. Gospodin mene ignoriše i piše da nema razuman odgovor za širenje neugodnog mirisa u Ilijašu.

Odgovor: Držanje stoke je definisano slijedećim Zakonima i Odlukom:

Zakon o veterinarstvu BiH ("Službeni glasnik BiH" br.34/02),

Zakon o poljoprivredi FBiH ("Službene novine FBiH" br.88/07),

Zakon o stočarstvu FBiH ("Službene novine FBiH" br.66/13),

Zakon o veterinarstvu FBiH ("Službene novine FBiH" br 46/00),

Zakon o poljoprivredi Kantona Sarajevo ("Službene novine Kantona Sarajevo" br.88/07,04/10).

Odlukom o držanju stoke na području Kantona Sarajevo ("Službene novine Kantona Sarajevo" br. 17/16 propisane su zoohigijenske i zootehničke mjere držanja stoke, područja na kojima je dozvoljeno držanje stoke, područja na kojima je zabranjeno držanje stoke, razvrstana po općinama, na području Kantona Sarajevo. U članu 21. navedene Odluke je definisano da nadzor nad primjenom ove odluke vrši kantonalni poljoprivredni inspektor smjera stočarstvo, zootehnika, odnosno općeg smjera.

MIRZA BEKTIĆ – vijećnik SDA

Inicijativa: Podnosim inicijativu prema JKP "Rad" Sarajevo da na lokalitetu naselja Gornji Kadarići postave dva kontejnera, a u donjem dijelu Kadarića na potezu od mjesnog doma prema Ljubničima postave jedan kontejner. Obrazloženje: U svakodnevnim razgovorima sa građanima Kadarića u pomenutim dijelovima naselja brojni građani izrazili su nezadovoljstvo sa rasporedom kontejnera, gdje se neki nalaze i do kilometar od ovih dijelova naselja.

Odgovor: Prihvatamo inicijativu i u saradnji sa KJKP "RAD" d.o.o. Sarajevo-RJ u Ilijašu, ćemo pokušati riješiti problem.

ŠEHERZADA ĆOSIĆ – vijećnica SDA

Inicijativa: Da općinski načelnik putem nadležne službe uputi zahtjev Kantonu Sarajevo, Ministarstvu saobraćaja tj. Direkciji za puteve Kantona Sarajevo vezano za odvodnju površinskih/atmosferskih voda na glavnom putu u naseljima Popovići i Salkanov Han.

Obrazloženje: Više puta smo obavještavali i isticali problem odvodnje površinskih/atmosferskih voda u naselju Popovići i Salkanov Han. Posebno u dijelu trase puta kod mesdžida u Popovićima i kuća Omerhodžić Šerifa i Spahić Salke u Salkanovom Hanu.

Odgovor: Inicijativa je proslijeđena Direkciji za puteve Kantona Sarajevo, do slanja materijala za Općinsko Vijeće nismo dobili odgovor, po dobijanju istog bit će dostavljen Općinskom Vijeću.

Napomena: U prilogu je odgovor na vijećničku inicijativu iz Policijske stanice u Ilijašu.

Služba za saobraćaj,
stambeno-komunalne poslove i građenje

**Bosna i Hercegovina
Federacija Bosne i Hercegovine
KANTON SARAJEVO
MINISTARSTVO UNUTRAŠNJIH POSLOVA
UPRAVA POLICIJE
SEDMA POLICIJSKA UPRAVA
Policijska stanica Ilijaš**

12. 07. 2019

Broj: 02/14-1-*31505*/19
Dana: 10.07.2019. godine

OPĆINA ILIJAŠ

**Služba za saobraćaj, stambeno-komunalne poslove i građenje
Ulica 126. Ilijaške brigade broj 6**

PREDMET: Alić Adem, vijećnička inicijativa, Informacija,
d o s t a v l j a s e,-

VEZA: Akt Službe za saobraćaj, stambeno-komunalne poslove i građenje, općine Ilijaš
broj 03/1-23-sl/19 od 17.06.2019. godine.

U prilogu akta, dostavljamo vam Informaciju povodom vijećničke inicijative vijećnika Alić Adema pokrenutu na 31. sjednici Općinskog vijeća Ilijaš održanoj dana 29.05.2019. godine u vezi saobraćajne signalizacije i odvijanja saobraćaja bicikla, na dijelu ulice 126 Ilijaške brigade od zgrade općine Ilijaš do gradske džamije Ilijaš uključujući i gradski trg Alija Izetbegović.

S poštovanjem

PRILOG:

-Kao u tekstu,-



GLAVNI PU

Glavni inspektor

Adem Alić
Adem Alić

INFORMACIJA

U vezi s aktom Službe za saobraćaj, stambeno-komunalne poslove i građenje općine Ilijaš broj 03/1-23-sl/19 od dana 17.06.2019.godine, povodom vijećničke inicijative vijećnika Alić Adema, pokrenutoj na 31. sjednici Općinskog vijeća Ilijaš, održanoj dana 29.05.2019. godine u vezi saobraćajne signalizacije i odvijanja saobraćaja bicikla, na dijelu ulice 126 Ilijaške brigade od zgrade općine Ilijaš do gradske džamije Ilijaš uključujući i gradski trg Alija Izetbegović.

Aktom Službe za saobraćaj, stambeno-komunalne poslove i građenje općine Ilijaš broj 03/1-23-sl/19 od dana 17.06.2019.godine obaviješteni smo da je na tridesetprvoj redovnoj sjednici Općinskog vijeća Ilijaš održanoj dana 29.05.2019.godine, pokrenuta vijećnička inicijativa u vezi saobraćajne signalizacije i odvijanja saobraćaja bicikla, na dijelu ulice 126 Ilijaške brigade od zgrade općine Ilijaš do gradske džamije Ilijaš uključujući i gradski trg Alije Izetbegovića.

U vezi s navedenim informišemo vas da policijski službenici Sedme PU-PS Ilijaš tokom obavljanja redovnih poslova i zadataka, u nevedenoj ulici svakodnevno poduzimaju mjere i radnje na obilasku dijela ulice 126 Ilijaške brigade i navedenog lokaliteta radi blagovremenog doprinosa sigurnosti saobraćaja.

Analizirajući stanje u ulici 126. Ilijaške brigade, općina Ilijaš na dijelu ulice 126 Ilijaške brigade od zgrade općine Ilijaš do gradske džamije Ilijaš uključujući i gradski trg Alije Izetbegovića smatramo da je neophodno da nadležni organ koji upravlja navedenom ulicom u skladu sa Pravilnikom o postavljanju saobraćajne signalizacije i opreme na putu te drugim zakonskim i podzakonskim propisima uz saglasnost i odobrenje nadležnog organa za saobraćaj postavi adekvatnu saobraćajnu signalizaciju i propisane saobraćajne znakove izričitih naredbi čime bi se stvorila dodatna sigurnost učesnika u saobraćaju. Također vas obavještavamo da su policijski službenici u prethodnom periodu pokretali prekršajne postupke protiv vozača vozila koji su evidentirani kao počinio prekršaja iz propisa Zakona o osnovama sigurnosti saobraćaja na putevima u BiH, te će i u narednom periodu nastaviti rad obilaskom navedene ulice u cilju održavanja povoljnog stanja sigurnosti u saobraćaju.

Ujedno vas informišemo da je u proteklom periodu također uočeno kretanje vozila-bicikla navedenom ulicom gdje su policijski službenici Sedme PU-PS Ilijaš, poduzimali preventivne mjere i određen broj vozača upozorili radi prevencije činjenja navedenih radnji, a nakon postavljanja adekvatne saobraćajne signalizacije, na ulaznim pravcima kod objekta Općine Ilijaš i raskrsnice ulica 126 Ilijaške brigade i ul. Hašima Spahića kod JU KSC Ilijaš, kao i bočnim ulazima u dio ulice 126 Ilijaške brigade gledano iz smjera ulice Ivana Franje Jukića i ul. Kakanjska, koji se vezuju sa ulicom 126 Ilijaške Brigade, kao i na ulaz na gradski trg "Alije Izetbegovića" smatramo da će se dodatno postići znatniji efekat sigurnosti svih učesnika u saobraćaju.

Ilijaš, dana 10.07.2019.